

TEXTOS DE POESIA TROBADORESCA

Non es meravelha s'eu Chant

- I Non es meravelha s'eu chan
melhs de nul autre chantador,
que plus me tra·l cors vas amor
e melhs sui faihz a so coman.
Cor e cors e saber e sen
e fors'e poder i ai mes;
si·m tira vas amor lo fres
que vas outra part no·m aten.
- II Ben es mortz qui d'amor no sen
al cor cal que dousa sabor:
e que val viure ses valor
mas per enoi far a la gen?
Ja Domnedeus no·m azir tan
qu'eu ja pois viva jorn ni mes,
pois que d'anoi serai mespres
ni d'amor non aurai talan.
- III Per bona fe e ses enjan
am la plus bel'e la melhor.
Del cor sospir e dels olhs plor,
car tan l'am eu, per que i ai dan.
Eu que·n posc mais, s'Amors me pren
e les charcers en que m'a mes,
no pot claus obrir mas merces,
e de merce no i trop nien?
- IV Aquest'amors me fer tan gen
al cor d'una dousa sabor:
cen vetz mor lo jorn de dolor
e reuiu de joi outras cen.
Ben es mos mals de bel semblan,
que mais val mos mals qu'autre bes;
e pois mos mals aitan bos m'és,
bos er lo bes apres l'afan.
- V Ai Deus! car se fosson trian
d'entre·ls faus li fin amador;
e·lh lauzenger e·lh trichador
portesson corns el fron denan!
Tot l'aur del mon e tot l'argen
i volgr'aver dat, s'eu l'agues,
sol que ma domna conogues.

- VI Cant eu la vei, be m'es parven
als olhs, al vis, a la color,
car aissi tremble de paor
com fa la folha contra·l vent.
Non ai de sen per un efan,
aissi sui d'amor entrepres;
e d'omne qu'es aissi conques,
pot domn'aver almorna gran.
- VII Bona domna, re no·us deman
mas que·m prendatz per servidor,
qu'e·us servirai com bo senhor,
cossi que del gazardo m'an.
Ve·us m'al vostre comandamen,
francs cors umils, gais e cortes!
ors ni leos non etz vos ges,
que·m aucizatz, s'a vos me ren.
- VIII A mo Cortes, lai on ilh es,
tramet lo vers, e ja no·lh pes
car n'ai estat tan lojamen.

Bernart de Ventadorn

NOTA: Trobareu la versió al català d'aquest poema en la proposta didàctica.